

Minister drs. Marisol Lopez-Tromp:

Centro di cuido San Nicolas ta den preparacion pa ehecucion

STA. CRUZ -- E proyecto di centro di cuido San Nicolas ta un proyecto hopi grandi y hopi importante. P'esey ya desde Gabinete Oduber III preparacionnan di proyecto aki a cumenza. E proyecto aki a nace di necesidad di Pueblo di San Nicolas pa un centro di cuido cu ta cumpli mihor cu su necesidadnan. Na aña 2001 ora cu Minister drs. Marisol Lopez-Tromp a drenta gobernacion, el'a encontra cu na San Nicolas e cas pa anciano tabata un school converti den un cas pa anciano anto esaki en realidad no ta cumpli optimalmente cu loke e habitantenan di e cas tabata tin mester. Den cuadro di e necesidad aki y a base di un mocion di Parlamento, Minister drs. Marisol Lopez-Tromp durante Gabinete Oduber III a cumenza cu e proyecto di centro di cuido San Nicolas. Den transcurso di e preparacionnan a dicidi di inclui cuido pa nos amigonan special (gehandicapten)

den e proyecto aki. Pues, como parti di e centro di cuido lo construi un cantidad di vivienda specialmente adapta pa gruponan vulnerabel den nos comunidad cu tambe tin necesidad di cuido y vivienda adapta. Pa prepara e proyecto y hink'e bon den otro Minister drs. Marisol Lopez-Tromp a pidi asistencia tecnico di e 'Adviescentrum Zorgvoorzieningen Nederland' cual tin experiencia cu centronan di cuido similar na Hulanda. A base di e asistencia aki a crea un programa di rekisito ('Programma Van Eisen') cu a forma e base di e diseño di e centro di cuido. Como puntonan di salida a tene cuenta cu integracion den comunidad di esnan vulnerabel, privacidad, dignidad di e persona y necesidadnan special di nos grandinan y esnan cu limitacion. Gobierno a evalua diferente forma pa financia e proyecto, esta via



Gobierno mes, via FCCA y via FDA. Al final a logra financiamiento via FDA. Den cuadro di esaki ta haciendo preparacionnan necesario pa lanza e proyecto via destaho publico. E proyecto ta den e fase aki. Asina cu e fase aki keda cla lo anuncia kende a gana e destaho publico y inicia cu construccion.